

Gij Angq Lajmbanj

Banningz gvaq, rumzsaeq ci gvaq, baiz roegnganh ndeu gyaep laeng fwjhou, youq gyang mbwn louzroengz baenz raq baenz raq singhemq raezrangh. Gizgyae, daemznaz lumj aenhaj henjgim, giz rumz ci daengz haenx, couh fub hwnj langh saekgim.

Gou caeuq dahcej caij gvaq nditbanhaemh, youzbyaij youq gwnz roeniq lajmbanj. Giz mbouj gyaep, gaemz doxgaiq saekhau ndeu menhmenh noddongh. Hi, dwg fwjhou daj gwnz mbwn doek roengzdaej la? Dou roxnyinh geizheih couh byaij gvaqbae, fwt riuhaha hwnjdaej — Haenx dwg duz yiengzlwg ndeu cingq gwn nywj! Gou lumhlumh de, de baenzneix unqnem. Gou siengj: Fwjhou gwnz mbwn wnggai hix dwg yienghneix unqnemnem ba!

Seizneix, aenrwz dingqnyi baenz raq sing hemqgaga, gou cienq ndang baez yawj, raen daxgoeng gaem diuz faexsauh, cingq gyaep gyoengq bit ndeu bae naz.



Dahcej singdaemq doiq gou naeuz: “Nuengx, raeuz bae gaeb bit ba!” Gou angq diuq hwnjdaej, han naeuz: “Ndei!” Gou caeuq dahcej yaemj din yaemj fwngz dwk byaij youq laeng gyoengq bit, siengj swnh gyoengq bit mbouj haeujeiq gaeb duz bit ndeu. Duzbit coengmingz lumjnaeuz nyouq daengz heiq

yungyiemj nei, dou lij caengz coemj hwnjbae, couh heuhgaga dwk, mbe fwed seiqcawq mbin deuz lo. Gou gaenjgip naeuz: “Dahcej, duzbit gvai raixcaix, raeuz aeu ra dieg ndeu ndoj hwnjdaej, caij ‘fwt caeggaeb’!”

Gou yawjyawj seiqlengq, gohaeux ndaw naz henzgyawj ngamqngamq gvej, cij law baenz nyup baenz nyup

ganjhaeux roz, gaenbonj ndoj mbouj ndaej. Gou yawjyawj dahcej, sikhaek miz cawjeiq lo. Gou gungj aennndang roengz daemq, ndoj youq laeng dahcej, yaeng’yaeng byaij. Dahcej ndaw sim roxyiuj, boiqhab gou ngamjlili, yamqdin mbaeuebyeb. Dou siujsim lili dwk depgyawj gyoengq bit. Couh youq seiz cij liz gyoengq bit geij yamq gyaep, gou daj laeng dahcej vaiqvut bongh okdaej, coemj coh duzbit ndang loq iq ndeu, da yawj yaek gaeb dawz duzbit lo, cix mbouj siujsim caij roengz gumzboengz bae. Doeklaeng duzbit mbouj gaeb ndaej, gou cix daengx ndang uq boengz, nyex ndaej dahcej caeuq daxgoeng riuhaha. Gou ngaem gyaep roengzdaej, yawjyawj swheij, hix riuhaha hwnjdaej.

Daengngoenz yaek doek baihsae, gou caeuq dahcej fwngz gaem fwngz, baez yamq baez yamq byaij youq gwnz roen ma ranz. Ndwenggoenz lajmbanj, caen angqyangz.

(Nez Buzyangz raiz
Nungz Cinfung hoiz)

Fwngz Yien Fwngz Ndei Cienz Ndei



Va la va la——Naedfwn lumj naedcaw mae roix goengq nei doeksatsat. Hunglung sing ndeu, byajraez lo, naedfwn lumjbaenz naedrin doek roengz namh, raemx sinz baenz va. Gou caeuq daxmeh dangq boux dangq gang liengj, caij raemxfwn ganj

bae ranz.

Seizneix, bakroen miz saekheu ndeu ronghsadsad——Bouxgyauhgingj lumj gocoengz enjaek ndwn youq gyang roen. De itndeu vadfwnz hawj ci dingz, itndeu youh dazyinx ci menhmenh hai baenaj. Dungcoz de aen aen cungj biucinj, mizrengz, lumjbaenz caeuq fwnhung beij ak.

Dou laebdaeb byaij baenaj, gvax gvaq gokhaw, gou yawjraen yabuz ndeu gaem faexdwngx youq gyang fwn byaij dwgrengz yedyed. Sawqmwh, yabuz fwngz unq faexdwngx doek, de ndwn mbouj maenh, laemx youq gwnz namh. Seizneix, miz bouxhenj ndeu cung gvaqdaej vaiq lumj rumz——Ho, dwg bouxgo soengqgaicawx! De aeu aen dienhei dingz youq henz yabuz, goengzyongq roengzdaej caeuq yabuz unqswnh naeuz: “Buz gaej lau, gou soengq mwngz bae yihyen.” De doq naeuz doq fuz yabuz hwnj ci naengh, hai ci bae yihyen.

Fwn lij doek, gavaq gou dumzdwddwd. Seizneix, gou yawjraen bouxau ndeu suk aen hoz de,

fwngz cw gwnz gyaep, youq ndaw fwn buet. Gou yawj bouxau haenx, naemj: Bouxau gyauhgingj youq gyang fwn dazyinx vunz ci gvaq roen, bouxgo soengqgaicawx simndei soengq yabuz bae yihyen, gou dwg mbouj dwg hix wnggai guh gijmaz ne? Daxmeh yawjok gou naemj gijmaz, riunyumnyum naeuz: “Damjlax di, siengj guh gijmaz bae guh ba!” Gou ngaekngaek gyaep, beng fwngz daxmeh buet daengz baihnaj bouxau, naeuz: “Au ha, aen liengj neix ciq hawj mwngz!” Gou doq naeuz doq aeu liengj ndenq hawj de. Bouxau mbat anj ndeu, gokda cumx lo.

Gou caeuq daxmeh gang aen liengj ndeu byaij bae ranz. Daxmeh naeuz, gou ngoenzneix lumj daengngoenz iq, dawz raeujrub bouxau gyauhgingj caeuq bouxgo soengqgaicawx cienz hawj bouxwnq. Gou sawqmwh roxnyinh, couhcinj dwg ngoenzfwn, nditndat hix ciuq ndaej haeuj ndawsim raeuz.

(Lij Yinhyez raiz
Lij Yanghlengz hoiz)

Diuzrij Seizdoeng

Byaij youq diuz roeniq cw rim naefaiq, langhda yawj bae, gij rum reuqroz rogdoengh hausaksak liux, lumj ngamq vanq dangzsa hwnjbae nei.

Diuz rijiq raemx sawdikdik gyoet dwk hojsouh raixcaix, vihliux hawj bonjfaenh lai miz di rengz, bienq raeujrub bae, de itloh cungj ciengq go mboujdingz. Singgo de mizseiz yiengjgugu, mizseiz yiengjvava, mizseiz yiengjdingdung, singgo bienqvuenh gij diuh mbouj doengz, caeuq doengh gij faexloeglingz, godumh youq gwnz roen bungzraen haenx doxdongx.

Gogaep raih hwnj doenghgo hamj gvaq rijiq, nanzdauh miz vunz niuj de gvaq ha? Hawj de daengx ndang utgoz, aen ndang saeqset niuj bae niuj dauq. Gizsaed ha, dwg youq seizhah, nengzgoemj, duzmoed, noncap aeu de dangguh giuziq raih hwnjbae, loengh

dwk de humz yaek dai cix mbaetheiq mbouj riu, de lau saeuj ndang le doengh duz gvaq giuz haenx doek roengzbae, cij niuj ha ut ha, ut ha niuj ha.

Ndaek rinheu damdoz liengzsangj ndeu, naengh youq gyang rij angqvauvau swiqndang. Gaej yousim, de coengzlaiz mbouj dwgliengz gvaq. Daengngoenz okdaej lo, raeujrubub ne. Duz doq hozhumz ndeu okrog daej dak ndit, nyaujiq gyoet dwk suk baenz ndaek, ninz youq ndaek rin dak ndat haenx gyoq ndit bouj rengzndang. De dakdak baihnaj, youh dakdak baihlaeng, baenqletlet, fatok gij sing vwng vwng.

Rijiq lij youq laj ndit ronghsagsag lae bae mbouj dingz, ciengq gij go bonjfaenh, yaep ndeu yiengjgugu, yaep ndeu yiengjvava, yaep ndeu yiengjdingdung…… (Siuh Dingli raiz
Lij Siulingz hoiz)

